

Libros

Preséntase un estudiu sobre la castañal n'Asturies

06-05-2009

El xueves 7 de mayu, a les 20:00 hores, nel Club Prensa Asturiana d'Uviéu (c/ Calvo Sotelo, 7) va facese la presentación del llibru *Cultivos de castaño de Asturias*, publicáu por KRK Ediciones. Trátase d'un estudiu colectivu firmáu por M.^a Belén Díaz Hernández, Marta Ciordia Ara, Ana M.^a Ramos Cabrer y Santiago Pereira-Lorenzo. Nesti actu van tar presentes, amás de dellos autores, Aurelio Martín, conseyeru de Mediu Rural y Pesca del Principáu, y Alberto Baranda, responsable del Área de Tresferencia y Formación del Serida.

Nel llibru trátense toles races de castañes qu'hai n'Asturies, cómo estremar unes d'otres reparando nos sos caracteres morfolóxicos (si son grandes o pequeñes, panzudes o lises, si pelen bien o non, si tienen un gustu más dulce o non, etc.). Toles castañes nun son iguales, nin tampoco los productos que d'elles pueden sacase d'elles, dende'l *marrón glacé* hasta la castaña asada, la fariña de castañes o lo que s'usa p'alimentación animal.

Esti trabayu tien una doble finalidá: per un llau, la identificación de los tipos de castañes asturianas y, per otru, valir de base pa programes futuros d'ameyoramientu col aquel de llograr un rindimientu económicu más granible d'esti árbol.